

懷仁縣新志卷二

山川 水利橋梁附

七峯山在縣西北三十五里高八里盤踞三十餘里  
山有七峯曰筆峯曰太史峯曰劍峯曰鼈峯曰白雲  
峯曰摩天峯曰玉女峯七峯羅列惟摩天峯最高其  
脊有青石盤旋至巔遠視如龍狀故又名玉龍山石  
壁有洞洞口風聲迅疾深杳莫測上建佛寺以鐵瓦  
覆之登視者援鐵索履浮木而上下覷諸山若凌空  
然中有恆嶽行宮山巖竦出風雨不侵誠天建也西

壁石鑿百梯上透山峯有玉皇聖母廟下有帝君廟  
十王殿東計二里許有朝陽寺又東一里許有黃龍  
洞皆峭壁險巖雖有浮橋遊人多不敢上

高家山在縣西北六十里王盛莊北

禪房山在縣西北三十里高七里盤踞四十里西連  
馬什嶺四老山北連七峯山之紅沙梁月窟嶺一峯  
壁立土人名丈人峯上有七級磚浮圖旁建佛寺禪  
房俱遼時所建道光間重修其塔高插雲表占雨一  
如清涼塔過其地者往往聞木魚聲

得勝山在縣西北二十五里口名寺峪入口石巖嶄峭山脊崎嶇又名葫蘆峪隆慶年上建元帝廟老君廟居人鑿砌石梯數里攀援而上下有石井深不可測

陳家峪山在縣西北二十里口內有耩腿山形如刻削相傳宋將楊業兵敗於此攷宋史潘美王侁陣於陳家谷口趣業進戰使人登托邏臺望之在今朔州西南甯武山上是陳家谷必附近朔州今本縣之陳家峪距朔州西南境二百里有奇且彼時遼復取寰

州為今馬邑鄉業等自雁門帥師北行戰敗引還不當反越馬邑而北也又西北五里有團山上有寺南五里有小磨峪諸山俱在禪房山東南岡嶺相接鷲毛山在縣西北十五里西通左右衛中多窑峪往來車馬不絕口內有駱駝山又西有麻燕山斧刃山形殊秀削

石井山在縣西十五里入口皆層巒疊嶺曲通清涼寺南有石井故得名焉邑廩貢孝義縣教諭陳國正石井記云悟道村夾溪而居循溪西尋半里源盡而

山壁立俯視石坪有石井焉口洞圓窺之正黑非砌石非淘沙穿穴塊石三數丈泉湧如鼎怒沸汲者必續修綆而後得水然亦有陡溢井外與溪合流之時水不受物好事者以石投井隨激射而出道光丙申邑大祲井亦隨涸居民汲飲鄰村後多逢年井養如故田家不諳五行用占豐歉多奇驗緣麓北去三里許聚族百家遂以井名其村

清涼山在縣西十五里高七里許頂有磚浮圖數百里外可望見每旱有白雲籠塔即雨舊有利國鐵冶

元西京爐冶之一也北壁有石礮土人云內有金鑽約三寸許觸之輒動取之不出石堂有地鼓擊之聲鑿鑿然西有寒泉雖盛暑不敢飲下建文殊院今半圯西北峪中有石人山峯頂石牙弩出為人形約五六酷似衣冠拱揖狀俗名石聖人

錦屏山在縣西北十五里山峯聳翠狀若列屏舊有磁窑鐵冶西有柏山分隸大同左衛西北有香爐山蘆子山在縣西南二十里舊有鐵冶西有牛頭嶺小峪山在縣西南三十里上有張萬戶洞勢甚險峻

有變人咸避兵於此俗名蟒窟相傳關帝斬蟒於此故南巖建關帝廟廟東有馬蹄遺跡其西南曰鵝鴿峪北曰豬頭山山下出泉又有馬鬃山五指山俱象形得名焉又有響石澗水石相激逸韻如琴同治八年石壁塌出字跡十餘行約畧記程之語

牙余山一名紅山峪在縣西南三十五里上有捨身崖

大峪山在縣西南四十里高五里盤曲二十餘里與左雲四峯山連接翠峯對峙林木森鬱上有鷗窩寺

寺上險絕處有鷗巢遺跡故又名鷗峪路徑差廣可通車行南達雁門西通紅羊峪雲西代北要道也明時賊犯應懷每出沒於斯當時撫按議築城扼守擇地創址竟未就緒

鶯架山在縣西南五十里張毛圪塔西北

燕家山東北距縣治六十里上有燕家洞石鐫燕洞寶重修五字又西南十里曰金龍山山下有泉通馬邑金龍池

寶峯山在縣西南九十里東連燕家山

薛家山在縣西南一百二十餘里與南寺山相對  
富寒嶺在縣西南一百二十三里與西黃花嶺相連  
高出羣山之表雖當盛暑尚覺寒氣逼人故名  
大樺嶺在富寒嶺西中多林木鄉人恆樵採於此  
西黃花嶺在縣西南一百二十五里與富寒嶺相接  
琉璃山在縣西南一百三十里即所里南北山之界  
娘娘山在縣西南一百一十里與山陰接界上有北  
嶽聖母諸廟因以得名

南寺山山中林木茂盛石徑崎嶇上有千佛寺詳見

寺觀

鎮子梁西北距縣治二十里獨峙一方高里許南北  
亘十餘里邑之東鎮也

三臺嶺在城北三里東西亘二十里長坡起伏為縣  
城後障

鵝毛河源發左雲老龍王山東流四十里入縣界出  
鵝毛口分為二北河流逕于家園東北十里過大同  
之霸王店復入縣境里八莊窑子坡水西北來注焉  
又東南三里至東作里西又五里至新發村西又東

南十里逕陳家莊入灰泉村折而東南至大同之神嘴窩入於桑乾河

五里河即鵝毛南支東南流逕窑村西小寨距城五里又逕何家堡東泉流始旺東南流逕磨道河村北東流至半截橋北折而東南至南晏莊入小峪河  
三里河發源北澗溝港汊紛歧衆流俱導逕三里莊東南至下寨村西逕風火臺至海北頭村北沙河西來注焉又五里至上海子村入小峪河

北沙河城北數十武昔無水今始出泉東南流逕管

家莊東又七里至海北頭入三里河

南沙河城南數十武逕七里寨北入黎家寨東南注小峪河

泥河縣西南十二里導流悟道口東流十里逕趙家莊西又東南與五龍海支流相會入磨道河村南至輝鳳坡西入宋家莊河

宋家莊河導源要集村西東南流入宋家莊又東過半截橋輝鳳坡入小峪河

鴛鴦河在縣西南二十五里二水交滙故名源發蘆

子口東南流逕宋家莊南又五里至雁頭村東入小峪河

小峪河距城二十五里導源柏山下流三十里出口逕莊頭村南過雁頭村至半截橋輝鳳坡東宋家莊河西來注焉又東五里至南晏莊東南五里河西北來注焉又逕曹四老莊南東流北折至下海子村北東南過鎮子梁會蝦兒河入於桑乾河

蝦兒河舊名薛家莊河距城三十里水出紅山峪東流逕王胡姜舖北又東過趙馬寨周家窑北又五里

入下濕莊南又三里逕馮家莊北又東北十二里入下海子村東南流逕鎮子梁會小峪河入於桑乾河大峪河即左雲之馬頭河至盃窰村入境東南出大峪口十里逕上希莊北又十里逕趙馬寨北又東南逕石家莊安岱莊南又五里至清水河堡南入應州劉霍莊東注於桑乾河其故道也邇來由清水河堡東北逕小寨南又東北過鎮子梁會蝦兒河入於桑乾河

清水河一名南河源出邑南四十五里之韭畦付東

南流逕南埠村南又五里逕水磨村北折而東南至應州之臧家寨入於桑乾河

新莊子河距城七十里兩源俱導一出劉晏莊貫家溝一出南家堡圪塔灘匯入新莊子村西南流逕黃花嶺出大于口入山陰界逕小圪塔入桑乾河攷水經注武周塞水出故城東南流出山逕日沒城南東有日中城又東有早起城在黃瓜阜北曲中其水又東流注桑乾河蓋古武周塞地勢遼廓盤踞數千百里北至大同之武周川南盡懷仁之黃花嶺北諸水

雖支派各別而均謂之武周塞水

桑乾河西北距縣治三十里邑中諸水俱匯入桑乾而過境處止黃家莊西安堡十餘里其水發源馬邑金龍池水經注謂之濕又謂之潦涇東北流左合武周塞水即新莊河入桑乾處也又東北逕白狼堆即清水河入桑乾處也又東流四十九里東逕巨魏亭北在今鎮子梁南邑諸水胥從此入又東逕劇陽故城崞川水注之在今西安堡東南即渾河歸桑乾之處過此即隸大同



鎮子海在縣東南十五里周迴二十五里中產鯉魚  
大十數觔鵝雁諸禽孕哺其間因居民決退水渠導  
流於桑乾故水涸魚竭變為禾黍近多產鹽  
灰泉在縣東二十里脉通黑河邊外燒荒草灰自泉  
湧出元大德乙巳夏懷仁地裂二所湧水盡黑漂出  
松柏朽木即此泉也今灰泉村西南里許有煖泉隆  
冬不凍正南有寒泉夏季水底猶有伏冰二泉寒煖  
不同而水灰黑如一又寒泉之東有土阜高丈餘大  
畝許掘三數尺便得泉味甚甘冽俗名水圪塔

梨園海一名長海在縣南三十里閃家寨迤邐六七  
里淵潭相接蒲葦橫敷中多魚蝦南涯建海神廟邑  
中瀦水無有大於此者海南里許有古北寺北寺之  
南有南寺今廢遺址畧存別一梨園海在周家窰西  
今涸

五龍海在縣西南十五里廣畝餘深不可測菱芡青  
蔥鯽鯉潛躍旁建五龍王蜡廟禱雨輒應每歲五月  
十八日報賽遊人甚衆

聖水泉在海子村北村舊無甜水忽平地湧泉清甘

而洌民咸賴焉旱禱輒應

神泉在縣北四十里泉二眼水甚甘冽

煖泉邑東北里許嚴寒不凍

雙井縣南九十里地一丈湧泉二所今砌為井故名

舊志有古鏡泉莎泉未詳其處

黑龍池在縣西南一百二十餘里土山下湧出泉水

相傳與朔州神頭金龍池相通

### 水利

鵝毛河水甚腴鵝毛口于家園甄家莊溉田甚多獲

利亦最厚里八莊灰泉村間亦引灌

五里河獨溉半截橋地約三十餘頃

三里河溉下寨地二十餘頃海北頭亦分用焉

北沙河溉管家莊地有餘則波及海北頭

泥河為磨道河村獨據之水定有水程村人按日輪

灌

小峪河溉小峪口莊頭宋家莊下濕莊諸村田隨宜

引溉無定程至曹四老莊草地上下海子村則分日

輪用週而復始

兒河水程十八日馮家莊上海子高鎮子各三日  
下海子水九日輪用  
大峪河溉田甚沃大峪口上希莊獨據上游引灌殊  
便為邑中上腴地東過趙馬寨石家莊則開渠築堰  
導水頗艱矣又東諸村堡定為水程二十日安岱莊  
水四日清水河堡水六日餘十日為應州石橋等村  
分用  
清水河舊溉南埠村稻田今不復種稻僅作水磨村  
飲灌嫌灘之用其獲利亦復不貲

新莊子河分灌南家堡興旺莊新莊子等村田

橋梁

西安橋跨桑乾河距城三十里

古道橋在大峪口內石橋四座今圯其一故碣甚多  
而人代要言俱為規利者所剝落相傳為素封嫠婦  
獨力興建以惠旅人然不可詳矣橋東百武有透玲  
碑俗訛為李陵碑碑中圓如尺璧朗印山水餘都蘇  
蝕古篆漫漶不可讀

南陽橋在縣南九十里之甘莊子據碑文創自萬

十一年道光六年重修西通右朔東入應山胥逕此  
橋

偏嶺橋距城七十里未詳建始旁有六郎擦脚石酷  
肖如印泥

三里橋跨三里河嘉慶二十一年邑貢生虞鄉縣訓  
導任世齡建

峙而為山流而為川一方之望也鍾靈毓秀燥濕  
剛柔之氣胥孕於是况山非童也興殖者廣水非  
潦也輸灌者多語焉而不詳山靈河伯無亦非笑

我乎探其幽穹繪其繚曲亦道元之遺意也並附  
津梁各從其類

古蹟 宅墓附

蘭池城漢書地理志沙南縣有蘭池城

早起城縣南三十五里安宿疇北遺址畧存北魏孝文帝築土人名雞鳴城亦曰食時城金史地理志懷仁有早起城

日中城亦孝文帝築在今日中城堡南遺址俱存水經注武周塞水逕日沒城南蓋夕陽西頽征車所薄之故城也東有日中城城東又有早起城舊志謂為唐雲中縣城秦時築所未詳也

日沒城即今黃昏城遺址猶存其地分隸大懷山三縣

陶林故縣遼史地理志奉義縣本漢陶林縣地後唐武皇與太祖會此

東城遼史地理志太祖與晉王李克用會於雲州之東城又曰恆安鎮今謂之東城是恆安奉義即東城而懷仁在其西疑即今之西安堡也故諺曰先有西安堡後有懷仁縣

南池水經注桑乾枝水又東流津委浪通結兩湖東

湖西浦淵潭相接水至清深晨鳧夕雁泛濫其上黛  
甲素鱗潛躍其下頰仰池潭意深魚鳥所寡惟良木  
耳俗謂之南池池北對涅陶縣故城舊志云懷仁東  
南舊有鎮子海周二十五里中產鯉魚水禽蕃育疑  
即古南池也按涅陶山陰故地在黃花嶺南與鎮海  
相距遠甚謂為南池者非是以未忍割愛仍錄於此  
崇國寺月臺前有生鐵一方濶四尺餘厚尺餘俗傳  
建城以來即有此鐵足履甚明

梨園嶺縣南二十里乃元薛御史菓園明初土人相

爭没人代府有樹百餘株其果甚佳後為梨園村今  
亦廢

玉龍洞縣西北四十里七峯山上石壁有洞上建三  
清廟遊人近洞口則風聲迅疾邑人參議李克用撰  
記攷水經注火山南岸有風穴厥大容人其深不測  
穴中肅肅常有微風雖三伏盛暑猶須襲裘寒吹凌  
人不可暫停其謂是乎

燕家洞在縣西南六十里燕家山其西向陽之石洞  
名張良洞子房辟穀從赤松子遊寓此

聚仙臺在縣西南六十里禪房村北之天羅寺寺廢  
臺存上有仙人鐵拐李腳跡拐印  
滴水崖在縣西南六十五里之金仙洞石壁有孔日  
滴水數壺可供一人用  
利國鐵冶在縣西清涼錦屏蘆子等山元史食貨志  
鐵在河東者太宗丙申年立爐於西京州縣撥冶戶  
七百六十煽焉武宗至大元年立河東都提舉司掌  
之所隸之冶八利國其一也一統志清涼有利國鐵  
冶

劉宴莊相傳昔劉宴居此嘗出粟賑饑里人德之以  
名其莊或疑為唐鹽鐵轉運使劉宴按唐書劉宴傳  
曹州南華人曾避地襄陽累官河東三川其後貶死  
中州與懷仁無涉又按宋史劉宴嚴州人入遼舉進  
士宣和四年南歸懷仁在宋為遼地或入遼時所居  
舊志謂前明山陰人劉宴當不其然  
吳兒城在縣西南一百二十里今已廢顛末未詳每  
當雨晴之際遠望城垣女牆宛然完好新莊村常見  
之村南有將臺北有古堡尚存

馬蹄灣在小峪口山勢壁立馬蹄雙雙印入石骨內  
橫列無數好事者剝落之內外如一悟道口內亦有  
一馬蹄灣

古寨在樺林溝周里許高據山腰寨內有泉湧出未  
詳建始何時旁建關帝廟

### 宅墓

北魏丹陽王叔孫建墓在三臺嶺北澗溝光緒元年七  
月塌出邑侯飭封閉之

金巨河清公張詡墓在縣東下寨村大定二十四年葬

其子張侯撞為上將軍石碑羊虎猶存

元平章政事趙璧墓在縣西南三里俗名趙閣老墳

中書左平章曹立墓在縣西北四老溝碑虎猶存

薛御史墓在縣南薛家莊為元御史石碑羊虎並存

其名不可考也

明布政使劉道墓在縣南曹四老莊西碑存

按察副使王汝濂故宅在縣治南鐵門巷

按察副使王汝濂墓殉節儀賓王爾揚暨婦代宗女

合葬墓在縣南萬金橋南地名輝鳳坡



總兵管一方故宅在縣治東倉巷  
總兵管一方墓在縣東北東作里  
布政參議李克中墓在縣西

國朝沐陽知縣魏正心墓在城北口泉道東距城五里有碑

城步知縣張乃紱墓在縣南薛家莊  
平定州學正王敞墓在縣東海北頭  
天津衛總兵李瑞墓在北沙河  
漏澤園在縣東一里許

義塚四在城四隅各一二里不等

九女墳在所里黃花嶺東墳隴尚存人代俱不可考  
相傳一富家翁女性最孝頃刻弗離親側及于歸伉  
儷情淡日飲泣以不得見父母是悲久之憂 成疾  
殆將不起諄囑其父曰兒雅不欲與人同穴但能別  
葬某所家山之路可識且得與諸姊妹聚死瞑目矣  
又叩其故不對而逝翁姑憐之僉從其願居無幾族  
中未嫁而夭者八人皆陪葬焉故名

惠將軍墓在城東三里許失名前明惠氏為望族今

無聞矣

劉官人墓在甄家莊失名

古塚四一在上南頭梁坡纍纍七八座厥大如邱一在石井村殘碣有至正元年字餘漫漶不可辨一在石家莊磚甃甚精緻一在小峪口名毛家墳下有乳泉俱不可詳矣

古往則今來其不與俱往者蹟是也君相所締造士大夫所留貽代遠年湮畧存梗概搜奇剔異者每於山高水清中髣髴遇之輒憑弔低徊不忍去

嗜古之癖謂人有同情可也及夫名賢邱隴久或拜掃無人古人有禁樵採於異世者何珍惜如此遺簪敝蹤物以人重況其大焉者乎